



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

M5.00

# MOELETSI OA BASOTHO

PARARE DOMINO PLEBEM PERFECTAM



RSL e betsa khoba

3


O tsomela Basotho mesebetsi

5



# O PEPESA BOBOLU

www.moeletsioabasotho.co.ls



Re se re fumaneha ho marangrang

Email: newsroom@moeletsioabasotho.co.ls  
Tel: +266 28350466/ Whats app: 62600983

# MOELETSI

## Ntoa ke mosebetsi

# Tlhokahalo ea metsi ke bothata



### Nthabeleng Seithleko

**M**aemo a pheto-phetoho ea leholimo a ama sechaba ka litsela tse fapakaneng, hajoale sechaba sa motse oa Tlhaha-lia-Tloka Nazareta, se seboko ke metsi a letsoai a kollang selibeng. Ba buile tsena, ka la 26 Motšeanong Monongoaha. Ba re bophelo ba bona bo itšetlehile ka seliba se sireletsoeng. Empa matsatsing ana sechaba se hlahisitse matšoenyeho ka tatso e makatsang ea letsoai metsing ao ba a noang, ba belaela hore metsi a katlas'a lefatše a haufi le mabitla a ka 'na a kena selibeng seo e leng sona feela mohloli oa bona oa metsi.

Motse ona o tobane le boemo bo makatsang moo metsi a seliba a shebalang a hloekile mahlong, empa a e-na le tatso e matla ea letsoai. Baahi ba re ba noa metsi ao ka bohloko, 'me b'a ipotsa hore na tatso eo e boima ha se pontšo ea seo lefatše le lelang ho ba hopotsa sona ka baholo-holo ba patileng haufi le moo. Baahi ba kopa 'muso ka potlako hore o kenelle ka ho ba fa metsi a hloekileng ho qoba

koluoa e ka amang bophelo bo botle e ka hlahang.

Morena Lone Matlali o itse metsi ke bophelo, empa motseng oa bona a se a fetohile thohako. O itse ba hloka metsi a sireletsehileng a tsoang lilibeng tsa borehole le liphaephehang-hang.

Ka lehlakoreng le leng Ntate Moholo Masheane Nkhetše o bontšitse hore metsi ao ha a sa na tatso ea metsi a hloekileng a pula. "A latsoeha joaloka letsoai," a rialo. "Ha se taba ea tatso feela empa re tšaba hore a tla qetella ka ho re kulisa hobane mohlomong a silafetse." A rialo.

O ile a hlalosa hore mehlang ea khale ba ne ba e-na le lipompo tsa sechaba, empa tsohle li ile tsa senyeha, hoo ba ileng ba qetella ba sebelisa seliba seo.

'Makhahliso Ramonkhe le eena o boletse hore ba tlameha ho belisa metsi ao a letsoai bakeng sa litlhoko tsa letsatsi le letsatsi, e leng bophelo bo bohloko boo ba bo mamellang letsatsi le letsatsi haufi le mabitla a baholo-holo bao ba bona.

Ka lehlakoreng le leng, mohlalobi oa bophelo seterekeng 'Maleloko Ncheche o hatelletse hore mabitla h'a lokela ho ba ka-

holimo ho mohloli oa metsi, hobane seo se ka beha sechaba kotsing ea mafu. O netefalitse hore Lefapha la Bophelo le tla etela motse oo ho ea hlahloba boemo bona.

Ho sa le joalo, muso o ntse o sebetsa ho atolosa phepele ea metsi a nooang a hloekilengng ka morero oa Lesotho Lowlands Water Supply Scheme (LLWSS). Merero ena e mehlo ea meaho e reretsoe ho matlafatsa boitokisetso khahlanong le pheto-phetoho ea maemo a leholimo, le ho netefatsa hore bohle ba fumana metsi a sireletsehileng.

Ho latela SDG 6, katoloso ea metsi a hloekileng le likhoere-khoere ke karolo ea bohlokoa bakeng sa bophelo bo botle, ntšetsopele ea moruo le boitokisetso khahlanong le phetoho ea maemo a leholimo, leha lefatše le ntse le tobane le mathata a maholo a ho netefatsa hore batho bohle ba fumana litšebeliso tse-na.

Lipheo tsa SDG 6 li kenyeletsa ho netefatsa hore ka selemo sa 2030 batho bohle ba fumana metsi a nooang a hloekileng, litšebeliso tsa bohloeki le tsamaiso e tsitsitseng ea metsi, hammoho le ho felisa tšilafalo le tšebeliso e sa sireletsehlang ea metsi

**R**e sechaba sa Basotho ebile re na le naha e bitsoang Lesotho tjena ka baka la bo-ntat'a ba ileng ba sebeletsa naha ena ka tlhompho, boiphano, boitelo le sebete. Hona le bo-ntate ba re sietseng lefa leo, hore e be ho rena khotso kahar'a lefatše.

Re na le bahale kahar'a Naha ea Lesotho, ba ileng ba bontša lerato le botšephehi mosebetsing oa bona, kamor'a hore ba nke kano ea hoba masole a naha, e le ho e sireletsa 'moho le thepa eohle ea eona.

Bahale ba na ba rona ba kentse letsoho haholo botsitsong ba lefatše, ka ho hlanaka ntoa ea bobeli ea lefatše, e neng e le mahlo a mafubelu. Hona ho paka hore ho na le batho bao esaleng ba ema le naha ena, e le ho bona hore seo baneng ba itlame ka sona se a phethahala. Mohale eno oa rona o hloka hahala tjena a le lilemo li 106.

Hoja masole a rona a hajoale a ka nka mohlala ho liqhoku tseno tsa rona. Ba sebeletsa naha ena ka boitelo le lerato la naha ea habo bona esita le botšephehi. Re ipiletsa ho bona ho khaotsa ho hlaha kahar'a litlolo tsa molao. Ba bang ke ba ne hona joale ba iphumana ba le matjaleng hoo ba ka ba ka iphumanang ba theohetse ka banneng. Rea tseba ba mamela litaelo ho tsoa ho bolauli, feela ha se hore leha ba bona hore ena ntho ke tlolo ea molao e be b'a e etsa. Ha ho motho ea kaholimo ho molao, etsoe ha hona motho ea nang le tokelo ea ho nka bophelo ba motho e mong, bophelo ke ba Morena Molimo feela.

Haele mona ho se ho timetse e mong oa bahale ba rona ba ntoa ea bobeli ea lefatše, ho se ho setse ba babeli feela, e mong o lilemo li 105, ha e mong li le 98.

Ruri hoa makatsa haeba re le naha ea Lesotho, re ipusa, ebile haufinyane re tl'o keteka lilemo tse 60, e be kannete hona le sechaba sa Basotho se ntseng se kha metsi lilibeng tse sa sireletsoang kapa hona ho kha linokeng le liqhantlaneng. Hona hore hona le moo litaba li sa tsamaeng hantle.

Re naha e ikhantšang ka metsi, ebile re re ke khauta ea rona e tšoeu. Re na le matamo ke ana, ebile ke hona a ntse a tsoelapele ho ahoa. A k'u utloe mehlolo ea metse e meng, haholo oa Tlhako-Lia-Tloka Nazareta, moo sechaba sa moo se noang metsi a letsoai, mohloli oa sona o tlohang tlas'a moo ho bolokiloeng baholo ba rona. Ho reng ho sechaba seo? Na ha se moo ba tl'o kula kaofela? Ruri ke lumela hore mabitla h'a lokela ho ba kaholimo ho mohloli oa metsi, hobane seo se ka beha sechaba kotsing ea mafu.

Leha e le mona re tló rekisetsa linaha tse ling metsi ona ana a rona, empa sechaba se Basotho se tlameha ho imona monoana pele a ka fetela metseng e pele. Ba ikarabellang hauhelang sechaba sa Basotho rea ipiletsa, seboko sa bona ha se ke se le hlomole.

Haeba 'muso o ikelelitse ka ho loantša tlhokahalo ea mesebetsi ke taba ea bohlokoa eo, rea thoholetsa. Bacha ke bona ba tsietsing e kholo ea ho hloka mosebetsi. Ba qeta nako eohle ba nyolosa ba theosa kahar'a litoropo ba nkile lienvelopo, ba isa likopo hohle mafapheng a ikemetseng le hona 'musong.

Feela taba ena ea ho batla ho hiroa kaofela re bona e ka ke bokulo, hobaneng re sa etseng lithuto tsa tla etsa hore re itšoarele ka matsoho a rona, etsoe re na le litalenta tse ngata tseo Morena Molimo a re fileng tsona. Re ka ikopanyang ka litsebo tseno tsa rona ea ba re etsa monna ea le mong ea toma ra etsoella pele ka mosebetsi le ka bophelo. E seng e be joale re batla ho sebetsa liofising kaofela, che moo setsoeng ke ha molapo.

Selekane se tlabotsoeng ke paramente le litsi tsa thuto le lipatlisiso se tló ntlafatsa boleng ba lebelo la mosebetsi oa eona ka lipatlisiso le tlhahlobo ea litsebi. Taba ena ka bo eona e tló thusa matlo ka bobeli a paramente ka ho fana ka tšehetso e lipatlisiso, likeletso tsa litsebi le tlhahlobo ea maano, le ho matlafatsa ho etsoa ha melao, tlhokomelo ea tšebetso ea 'muso le ntšetsopele ea maano a Lesotho. Taba ena e tlo thusa ho rarolla mathata a bakoang ke khaello ea litsebi le tlhahlobo e tebileng litabeng tse fapakaneng.

### MOLIMO A BOLOKE LESOTHO LE BASOTHO

Contacts: +266 28350 466

62600983 WhatsApp

Email: [newsroom@moeletsiobasotho.co.ls](mailto:newsroom@moeletsiobasotho.co.ls)

Sales and Marketing: (+266) 28 350 466/ 57396597 (WhatsApp)

**MOELETSI oa BASOTHO**  
A LOKISETSE MORENA SECHABA SE PHETHEHLENG (LUKE 1,17)

EMAIL: [editor@moeletsiobasotho.co.ls](mailto:editor@moeletsiobasotho.co.ls)

[sub-editor@moeletsiobasotho.co.ls](mailto:sub-editor@moeletsiobasotho.co.ls)

Mohale Lehlohonolo (Sub-editor)

(+266) 58 771 507 / 62 771 507

#### Journalists

Nthabeleng Seithleko

Tšelis Thakholi

Production Desk: 'Mateele Liqa

57 665 038/ 68 216 271

58 540 853/ 63 480 404

# Liparamente li ela hloko litsebi



## Nthabeleng Seithleko

**E**le ho ntlafatsa Lefapha la Lipatlisiso, Paramente ea Lesotho e tlabotse selekane sa tšebeliso 'moho le litsi tsa thuto le lipatlisiso, ka sepheo sa ho ntlafatsa boleng le lebelo

la mosebetsi oa eona ka lipatlisiso le tlhahlobo ea litsebi. Tsena li bile paramenteng ka la 26 Motšeanong monongoaha.

Tumellano ena e tla thusa matlo a paramente ka bobeli ka ho fana ka tšebetso ea lipatlisiso, likeletso tsa litsebi le tlhahlobo ea maano, ho matlafatsa ho etsoa ha me-

lao, tlhokomelo ea tšebetso ea 'muso le ntšetsopele ea maano Lesotho.

H'a bua mokiteng oa ho tekenela tumellano ena, Molula-Setulo oa litho tsa Ntlo ea Senate, Dr. Thabiso Lebeso, o amohetse tšebeliso ena, a re e tla thusa ho rarolla mathata a bakoang ke khaello ea lit-

sebi le tlhahlobo e tebileng litabeng tse fapakaneng.

Dr. Lebeso o buile ka likarolo tse ling tsa molao oa lefa, tseo a reng li bonahala li sa lumellane le molao-theo oa naha, a bontša hore mathata a joalo a totobatsa bohlokoa ba ho ba le litsebi mosebetsing oa paramente. Ha litsebi li le teng ho ba thusa ho etsa liqeto tse nang le boiphihlelo le boleng. "Re hloka ho etsa liqeto tse tlišang phetoho kahar'a Sechaba, re na le boitšepo, re utloisisa han-

tle seo re se etsang." Ke Dr. Lebeso eo.

Motlatsi oa 'council' ea Sekolo se Seholo sa Sechaba, Prof. Olusola Fajana, o hlalositse tumellano ena e le mohato o moholo bakeng sa litsi tsa thuto e phahameng kahar'a naha. O itse tšebeliso ena e tla nolofalletsa litsi tsa thuto ho kenya letsoho ka kotloloho ntšetsopeleng ea naha, ka ho thusa paramente ho fetisa melao ea boleng e tla tsoela sechaba molemo.

A re ntle ho litsebi, ha ho



# RSL e betsa khoba

## Nthabeleng Seithleko

**E**le ho ntlafatsa phetisetso ea melaetsa sechabeng le ho ntlafatsa tšebeliso ea boqapi le mokhoa oo sechaba se ka fumanang melaetsa ka oona, Setsi sa Pokello ea Lekhetso se bitsitse khoba ka ho fa bahlooli thoholisanong eo matsebe-tsebe. Tsena li bile ka la 27 Motšeanong monongoaha.

RSL e thoholelitse baqapi ba litaba le batho ba susumetsang sechaba ka marang-rang ka tlatsetso ea bona ho matlafatsa tlhokomeliso ea sechaba, le ho eketsa karolo ea batho letšolong la morao tjena la ho tlatsa liforomo tsa lekhetho.

Puong ea hae, Mokomishenara Kakaretso oa RSL, Rakokoana Makoa, o re letšolo lena le atlehile ho ruta Basotho bohlokoa ba ho tlatsa liforomo tsa lekhetho la meputso, ho lefa lekhetho ka nako le ho utloisisa littamorao tsa ho se latele melao ea lekhetho. O ile a hlakomelisa hore ho latela melao ea lekhetho ha se tlammo ea molao feela, empa hape ke pontšo ea lerato la naha le tlatsetso ntlafatsong ea naha.

"Ho RSL re lumela hore ho latela melao ea lekhetho ho

feta feela setlammo sa molao, ke ketso ea bochaba. Ha baahi ba latela boikarabelo ba bona ba lekhetho, ba kenya letsoho ntlafatsong ea naha, litšebeliso tsa sechaba, meralong ea motheo le kholong ea moruo oa rona." Ho boletse eena.

Makoa o bontšitse hore mekhoha ea puisano e ntse e fetoha ka potlako, haholo-holo har'a bacha ba sebelisang liforomo tsa marang-rang le mecha ea litaba ea sechaba ho fuma-na leseli. O re sena se ile sa susumetsa RSL ho sebelisana ka maano le baqapi ba litaba, le batho ba susumetsang sechaba, ho hasanya melaetsa ea tlhokomeliso ea lekhetho ho balefi ba lona.

H'a fana ka thaloso mabapi le thoholiso ena, Mot-samaisi oa Lipapatso oa RSL, 'Mateboho Makote, o itse tšebeliso pakeng tsa RSL le baqapi ba litaba ebile le karolo e kholo ho atolosa melaetsa ea thuto ea lekhetho lichabeng tse fapakaneng haholo-holo har'a bacha.

O bontšitse hore tšebeliso ea batho ba susumetsang sechaba le phetiso ea litaba ka mekhoha ea boqapi, e thusitse RSL ho fetisa tlhahiso-leseling ea bohlokoa ka tsela e utloisisehang le e atamelehang habonolo ho sechaba. O itse ka

letšolo lena baqapi ba litaba ba atlehile ho phahamisana ponahalo ea melaetsa e amanang le lekhetho har'a bamameli ba fapakaneng, hape ba khothaletsa tlhokomeliso le karolo ea batho ka ho susumetsana.

Ho feta moo, Makote o itse tšebeliso ena e sebelisitse mantsoe a batho ba tšepjoang lichabeng, e leng se entseng hore ho be bonolo hore sechaba se utloisise bohlokoa ba ho tlatsa liforomo tsa lekhetho le ho latela boikarabelo ba lekhetho. O ile a eketsa ka hore letšolo lena le boetse le atlehile ho matlafatsa karolo ea bacha le bamameli ba sebelisang liforomo tsa marang-rang, kaha liforomo tsa sejoale-joale tsa puisano li ntse li bapala karolo ea bohlokoa ho fihlela batho ba bangata.

Ka lehlakoreng la baqapi ba litaba le mohloli oa moputso oa thoholiso ena,

Monaheng Mphahama, o ile a leboha RSL ka ho theha sethala se fang baqapi monyetla oa ho bontša talenta ea bona ha ba ntse ba kenya letsoho matšolong a tlhokomeliso ea sechaba. O itse ho hapa thoholiso ena ke tlotla e kholo e bile ke khothatso ho eena hore a tsoelepele ho sebelisa boqapi ho fetisa melaetsa ea bohlokoa sechabeng.

"Ona ke monyetla o bontšitseng hore mosebetsi oa boqapi o ka bapala karolo ea bohlokoa, ho ruta Basotho ka litaba tsa bohlokoa tsa naha tse kang ho tlatsa liforomo tsa lekhetho." Ho boletse eena. H'a tsoela pele o khothalelitse bacha banang le talenta Lesotho ho lula ba ikemiselitse mesebetsing ea bona, le ho nka monyetla e khothalelitse baqapi le ntšetsopele ea litalenta.

Mokete oa likhau o ile oa tlotla baqapi ba 11 ba ileng ba nka karolo ho hlahiseng, le ho aba litaba tsa letšolo nakong ea ho tlatsa liforomo tsa lekhetho.

naha e nang le tsoelopele, kahoo ho bohlokoa hore Naha ea Lesotho e tsetele ka matla ho litsebi tsa eona hore thuto e se be taba e nkoang hanyane. O re o thabetse monyetla ona, kaha e le pula-maliboho bokamosong ba Lesotho.

Molula-Setulo oa Balula-Litulo ba Likomiti tsa Paramente, Mokhothu Makhalanyane, o itse mohato ona o tla thusa ho ntlafatsa mosebetsi oa paramente 'moho le ho tšehetsa ntšetsopele ea maano a nepahetseng ho khothaletsa kholo ea naha le ho rarolla mathata a tobaneng le Lesotho.

Tumellano ena e boetse e reretsoe ho khothaletsa phapanyetsano ea tsebo lipakeng tsa baetsi ba melao le litsi tsa thuto, ho matlafatsa lipuisano le maano, ho aha bokhoni ka tšebeliso 'moho le ho theha monyetla bakeng sa bathuti ba maemo a holimo le litsebi ka mananeo a boithuto le koetliso mesebetsing.



# MOELETSI O TŠEHETSA BACHA

**Tšeliso Thakholi**

**K**e nepo hore mocha a itšoarele ka matsoho e le hore a tsebe ho bona menyetla e ka bang teng ea ho iphelisa ka talenta eo a nang le eona, a sa le mocha kaha thupa e lokela ho otlo- loa e sa le metsi. Abuti KT eo e leng mothehi oa khoebo e bitsoang Strataburger # E Besuoe, e rekisang lijo tse ikhethang ka ho phehoa ka makhethe le ka monate o lutlisang mathe tsa mefuta e fapakaneng ea 'burger'. O re qoqela ka tsa khoebo ea hae e tlisitseng phetoho bophelong ba hae le ba batho ba bang bao a ba sebeletsang letsatsi ka leng.

Khoebo ena e fumaneha khubung ea Motse-Moholo Maseru, sebakeng se bitsoang Sefateng haufi le Memorial Hall. Strataburger ke mohlala o motle ho bacha hore ba itšoarella le ho iketsetsa ka matsoho, hobane hoo ho ba thusa ho itlhalahisa mesebetsi le mekhoha ea boipheliso. E boetse e fana ka mohlala o motle oa ho hlokomelisa bacha ka litsebo tse fapakaneng tsa mahlale a thuto le a kelello, tseo ba ntseng ba lutse ka tsona hae ho se letho leo ba le etsang, ba lokela ho bula mahlo le likelello tsa bona ho itšoarella ka matsoho e le hore ba tle ba tsebe ho atleha bophelong ba bona. Ebe KT o reng h'a bua ka Strataburger?

## STRATABURGER KENG?

Strataburger ke khoebo e rekisang mefuta e fapakaneng ea sejo se monate ka ho fetisisa kahare ho toropo ea Maseru se bitsoang 'burger'. 'Burger' ke sephaphatha sa bohobe, ebe kahare ho sona ho khabelloa meroho, ho tšelo mofuta oa nama e bitsoang 'beef petty'. E boetse ena le nama e 'ngoe ea 'sausage' le 'russian'.

'Burger' e ka boela ea eba le nama e 'ngoe ea likhobo, eo boholo ba nako ebang tsa fariki. Kantle ho tsena tseo ke seng ke li boletse re boetse re kenya 'cheese' kahar'a bohobe bona. Joalokaha ke se ke boletse mokhoa oa eona e tla fapakaneng ka hore na e tšetse'ng kahare. Ke eona 'burger' ea rona e monate ena, 'me hona joale re mothating oa ho tla etsa hore e tsamaee le li-chips ho latela likhotha-



letso tsa bareki ba rona.

## STRATABURGER

Strataburger ha e qala ka 2017 e ne e se ea ka, 'me e ne e bitsoa # E Besuoe, kaha nama eohle e neng e fumanoa khoebong ena e ne e le e besuoeng feela. Lebitso lena la Strataburger, le qalile ka 'na ka 2023, ha ke ne ke bula khoebo ena kamor'a hore beng ba eona ba e koale nako e telele ka lebaka la ho kopana le liqholotso tse fapakaneng.

Ha ke tla khahloa ke mofuta ona oa khoebo, nakong eo ke neng ke ntse ke seb-

etsa haufi le khoebo ena ke ne ke reka lijo mono letsatsi ka leng. Ke se ke bile ke fetohile moreki e moholo oa teng, e leng moo ke ileng ka 'na ka ithuta bohlokoa ba khoebo ena. Ka bona hore bophelo bo teng mona. E itse ha beng ba eona ba se ba e koala ka khahloa ke ho e bula feela ke se ke e matlafalitse haholo. Ke ha ke tla e reha lebitso la Strataburger # E Besuoe. Ho buoa 'nete re bahlahisi ba 'burger' e monate haholo kahare ho Maseru!

## CHEBELO PELE

# Bobolu bo ja setsi

manoe nakong ea tlhahlobo ea banka. Hamorao ho ile ha netefatsoa hore chelete e nyametseng e ka ba M58Millione.

Nyeoe ena e ama baseb-

## Nthabeleng Seitlheko

**T**laleho ea Mohlahlobi e Moholo oa Libuka Adv. 'Mathabo Makenete, ea selemo sa 2022/23 e sibollotse hore chelete ea 'muso e neng e nyamele, linyetlelitsoe likhoebong tsa Afrika Boroa le tse 'ne tsa Lesotho. Litaba tsena li hlahella kahar'a tlaleho e tekiloeng ka la 27 Motšeanong monongoaha.

Tlaleho ena e hlhang tlasa sehlooho se buang ka tsamaiso ea lichelete, e re ho na le linyeoe tse 'maloa tse ntseng li mameloa makhotleng, moo basebetsi ba bang ba belaeloang ka ho sebelisa hampe kapa ho utsoa ha lichelete tsa sechaba.

Ka selemo sa lichelete sa 2022/23, ho ile ha sibolloa bosholu ba chelete e fetang M50Millione Letloleng la Naha (Consolidated Fund). Nyeoe ena e ile ea tlalehoa ke Accountant General ho mapolesa kamor'a hore litaba tse belaeloang li fu-

etsi ba Lefapha la Pokello ea Lichelete hammoho le batho ba bang ba kantle ho 'muso. Ho se ho tšoeroe batho ba ka bang 18, ba 17 ba lokollotsoe ka beile, athe e mong o tšoaretsoe Afrika

Ke rata hore khoebo ena ea rona e tsebahale haholo ho feta mona moo e seng e ntse e tsejoa ke batho, empa ke ntse ke belaela hore ha e-s'o tsebahale ho lekana. Ke lakatsa hore ka letsatsi le leng e hole e fihlele batho bohle literekeng tse leshome tsa naha, kaha ha joale re sa ntse re fumaneha Maseru mona feela, che le hoja re e-na le bareki ba seng ba kae literekeng tsa Leribe le Botha-Bothe.

Re lakatsa hore re tle re ba atameletse eona haufinyane, kaha qholotso eo re kopanang le eona ke hore leha re ba tlisetsa eona, ba e ja ka nako e 'ngoe e se e bata haholo, kaha lijo li monate ha lijeoa li ntse li chesa haholo nakong tse-na tsa Mariha. Empa ba ntse ba e thabela haholo ka lebaka la monate oa eona le hore ha se lijo feela, li matlafatsa 'mele. Re boetse rena le bareki ba rona Seterekeng sa Qacha's Nek le Quthing, bao le bona ba e batlang ka matla a maholo, 'me re lakatsa ho ba atameletsa eona literekeng tsa bona. Joalokaha ke se ke boletse morero o moholo ke ho ba atameletsa eona haufinyane e le hore ba e fumane habobebe le hoba le makalana literekeng.

## KELETSO

Boroa moo nyeoe ea ho khutlisetsoa Lesotho e ntseng e tsoela pele.

Ka Pulungoana 2023, sehlopha sa bafuputsi se ile sa khutlisa likoloi tse neng li hapiloe Bloemfontein, 'me chelete e ka bang M5Milli-

Bacha ba lokela ho bona hore na ba itšoarella ka matsoho joang. 'Na ha ke qala ke ile ka leka likhoebo tse ngata haholo, kaha ena e ne e se ea pele, ke e 'ngoe ea tse sebelitseng hantle haholo. Ka hona ke eletsa bacha hore ba se ke ba khathala matla ha ba kopana le liqholotso. Ba leke mahlakore ohle, ba se ke ba tsoafa ka le reng ba khathetse. Kahar'a likhoebo tse ngata tseo ba tla li leka hona le eo mocha a ka atlehang haholo ho eona.

Haeba mocha a qalile ka mofuta o itseng oa khoebo, eba o kopana le liqholotso a 'ne a e leke a se ke a khathala matla ho fihlela a atleha. A se ke a nyahama hle! A tsebe hore liqholotso ke karolo ea bophelo. Hape bacha ba tsebe hore katleho ha etle ka letsatsi le le leng, 'me ba be le mamello le lerato la seo ba se etsang. Ba se ke ba etsa feela hobane ba batla chelete, empa khoebo e hloka tlhokomelo le lerato le tebileng.

## BOIPILETSO HO 'MUSO

Re kopa 'muso oa habo rona ho re tšehetsa re le bacha likhoebong tseo re seng re ntse re ena le tsona, le ba ka ratang ho ithehela likhoebo, 'muso o kenye letsoho hore re ruta ho cheha tlhapi e seng o re fe tlhapi.

pani tse ka bang robong Afrika Boroa le tse 'ne Lesotho tse amanang le nyeoe ena. Boholo ba chelete bo belaelo hore bo ile ba fetisetsoa likampaning tsa Afrika Boroa.

Tlaleho e boetse e bontša mathata a bakoang ke khaello ea melao ea 'cybercrime' le ho haella ha laboratori ea 'cyber' e ka thusang ho hlahloba litšebeliso tsa sejoale-joale le lisebelisoa tsa marang-rang ka phetsetsano ea lichelete. Sena se sitisa lipatlisiso tse tebileng tsa bosholu bo etsoang ka mekhoha ea tsamaiso ea lichelete ka marang-rang.

Lefapha la Polokelo ea Lichelete le filoe boikarabello ba ho netefatsa hore melao ea tsamaiso ea lichelete tsa sechaba ea lateloa. Lefapha lena le matlafalitse tšebetso ea ho hlahloba le ho tiisa taolo ea kahare ka tšebetso e matla ea bahlahlobi.

Ho netefatsa hore melao ena ea lateloa, Seolesa sa Lesotho le sona se behile sehlopha se khetheleng se sebetsang le Lefapha la Poloko ea Lichelete ho tiisa hore ho na le boikarabello le taolo e ntle ea lichelete tsa 'muso.



one ea khutlisetsoa mekotleng ea 'muso. Sena se ile sa etsa hore kakaretso ea chelete e seng e khutlisitsoe e fihle ho M23Millione.

Liphuputso li boetse li fumane hore ho na le likam-

# 'Muso o tsoemela Basotho mesebetsi

## Nthabeleng Seitlheko

**E**le ho fihlela tharollo ea moshoelella litabeng tsa tlhokahalo ea mesebetsi, 'Muso oa Lesotho o tsoere ka natla ho fetola boemo boo pale ea maobane, ka ho kena leetong la ho romela basebetsi lineheng tse ling.

Litaba tsena li tiisitsoe ke Letona la Khiri le Bosebetsi, Mohlomphehi Tšelisio Mokhosi, ka la 26 Motšeanong monongoaha, a supa hore ho se ho fihletsoe litumellano tsa tšebeliso le linaha tse 'maloa.

Mokhosi o re Lesotho le naha ea Qatar li se li phethetse litumellano tsa tšebeliso ka mafapha a tsona a basebetsi, 'me ho setseng feela ke ho phethela karolo e amanang le mekhatlo ea ho hira basebetsi, e lebetsoeng ho phethoa ka Phupjane monongoaha. O boetse a hlalosa hore Lesotho le boetse e fihletse litumellano le United Arab Emirates, moo linaha tsena li ntseng li emetse tumello ea makhotla a matona pele merero e ka qala ho sebetsa.



O boetse a re lipuisano pakeng tsa Lesotho le Saudi Arabia li se li tsoetse pele, moo linaha tsena li phethela litumellano tse tla nolofatsa ho romelloa ha Basebetsi ba Basotho ba nang le boiphihlelo mafapheng a kang mesebetsi ea matsoho, bohahlauli, mahlale a tlhahiso leseling (IT), ho khanna likoloi tse kholo, tšireletso le 'engineering'.

H'a bua ka matšoenyeho a Basotho mabapi le polokeho ea mesebetsi ea kantle ho naha, o tiisitse hore ho ntse ho etsoa mehato ea ho thibela khoebisano ka batho le tšekefetso ea mofuta ofe kapa ofe. O re linaha tse amehang li ikemiselitse ho netefatsa polokeho ea basebetsi nakong ea maeto, leha ba se ba fihlile linaheng tseo ba tla

sebetsa ho tsona.

Ka hona o khothalelitse Basotho ho qoba ho amohela mesebetsi ea kantle ho naha ntle le ho buisana le Lekala la Bosebetsi le Khiri ho netefatsa menyetta eo.

Ho fihlela hajoale, maemo a tlhokahalo ea mesebetsi h'a jese litheohelang, haholo ho bacha, le ho koaloa ha lifeme, 'me re ikemiselitse ho tla ka mekhoe e mecha

e tlišang phetoho litabeng tsena.

"Sechaba se lapileng ha se khone ho aha naha kapa ho nahana ka bokamoso bo betere. Tlala e senya seriti sa batho, e ama bana likolong, e eketsa bofuma e bile e baka botlokothebe le ho nyahama har'a bacha," ho boletse e mong oa bacha, Tšepo Masupa.

Masupa o re boemo ba tlala Lesotho e ntse e le tlakotsi, haholo metseng ea mahaeng moo malapa a mangata a ntseng a sokola ho fumana lijo tsa letsatsi le letsatsi. O bontšitse hore ho latela litlaleho tsa mokhatlo oa lefatše oa Lijo (WFP), malapa a ka bang 56% Lesotho a sitoa ho atleha ho reka lijo tse nang le phepo e nepahetseng, athe batho ba fetang 631,000 ba tobane le khaello ea lijo naheng ena.

A re bacha ba lokela ho kenngoa ka matla mererong ea temo, likhoebo le boqapi e le hore ba tsebe ho iketsetsa mesebetsi le ho thusa malapa a bona. O boetse a khothaletsa 'muso le mekhatlo e ikemetseng ho tsetela haholo manaoneong a tšehetsang temo ea sejoale-joale, tlhokomelo ea bana le mesebetsi ea bacha.

# Lipuisano tse bulehileng ke ntlafalo

## Nthabeleng Seitlheko

**L**ekala la Bophelo ka tšebeliso le mekhatlo ea basebetsi hammoho le Mokhatlo oa Machaba oa Basebetsi (ILO), le tsoere thupelo ea tlhokomeliso ma-

bapi le likamano tsa basebetsi lekaleng la bophelo ka sepheo sa ho matlafatsa lipuisano le tšebeliso pakeng tsa bahiri le basebetsi. Tsena li bile ka la 26 Motšeanong monongoaha.

H'a bua nakong ea thupelo ena, David Matšela oa Mokhatlo oa Basebetsi ba Baoki oa Qiloane, o re kopano ena e atlehile ho tsoaroa

ka lebaka la Tumellano ea 151, e fang basebetsi le bahiri monyetla oa ho buisana ka litaba tsa mosebetsi ka kopanelo.

O boletse hore Lekala la Litšebeliso tsa Sechaba le bile le karolo ea bohlokoa kamor'a ho tekenoa ha Tumellano ea 151, le ho kenngoa tšebetsong ha Molao oa Basebetsi oa 2024.

Matšela o re thupelo ena e tataisoa ke Tumellano ea 98 ea ILO, e tsejoang hape e le tokelo ea ho ikopanya le ho buisana ka kopanelo, 'me e shebane le ho ntlafatsa lipuisano le ho rarolla mathata a amang likamano pakeng tsa bahiri le basebetsi. O hlalositse hore Lekhotla la Lipuisano ke sethala se kopanyang bahiri

le basebetsi ho buisana ka litaba tsa mosebetsi le ho ntlafatsa maemo a tšebetso.

Matšela o tiisitse hore bahiri le basebetsi ba lokela ho sebetsa 'moho ho netefatsa hore litšebeliso li tsamaea hantle, a re tšebeliso ke eona e tla thusa ho fihlela sepheo se tšoanang lekaleng la bophelo.

O boetse a leboha Mokhatlo oa Machaba oa Basebetsi ka tšehetso ea litsebi le koetliso ea litsebo, a re bankakarolo ba lebelletsoe ho tsoa thupelong ena ba e-na le tsebo le kutloisiso e ntlafetseng mabapi le likamano tsa basebetsi.

E mong oa ba thupelong ena, 'Malentsoe Mphakalasi, o hlalositse hore thupelo ena e t'lo ba thusa ho ba le lipuisano tse bulehileng pakeng tsa bona le makala. A re re phela nakong eo bongata bo lumelang hore lipuisano ke tsona tse ka thusang kholong le ntlafalong ea malapa.

A bontša hore ba ikemiselitse ho bona kutloisisano litabeng tsa bohle ba amehang, lintho li etsoa ho ipapisitsoe le molao ho qoba khatikelo ea Litokelo tsa Mantlha tsa Botho.



**Water Project** marks 40 years and Lesotho celebrates **60 years of independence**, the nation is also blessed to celebrate a far more personal treasure, **Her Majesty Queen 'Masenate Mohato Seiso**, who turns **50** on the **2nd of June**.

A devoted champion of **Basotho women, children, and communities**. On this joyful occasion, **LHDA** joins the nation in **honouring Her Majesty** and wishing her many more years of **health, happiness, and continued impact**.

*Motšoa. Pula. Nala.*



40  
THIS IS  
YEARS OF IMPACT



*An Inspiring  
Celebration*

ON THE OCCASION OF THE BIRTHDAY OF  
HER MAJESTY  
QUEEN 'MASENATE MOHATO SEEISO.



2026 is a year of remarkable milestones for Lesotho. As the **Lesotho Highlands**

# Mohale oa ntoa ea bobeli o'a bolokoa

## Nthabeleng Seithleko

**M**ohale oa Ntoa ea Bobeli ea Lefatše, Lance Sergeant Lekena Sematlane, o hlalositsoe ka ho sebeletsa naha ka hlomphe, boite-lo le sebete, a siea lefa le lehlo har'a Basotho. Sena se boletsoe ke libui tse fapakaneng nakong ea tšebeletso ea lepato la hae e neng e tšoeroe ka la 23 Motšeanong monongoaha.

H'a bua tšebeletsong eo, Tona kholo ea mehleng Dr. Pakalitha Mosisili o itse ho nka karolo ha maqheku a ileng a loana Ntoeng ea Bobeli ea Lefatše moketeng oa Armistice Day, ho lula ho bontša boitelo boo Lesotho le ileng la bo etsa bakeng sa khotso ea lefatše.

O ile a khotlaetsa lela-pa la Sematlane hammoho le sechaba hore ba lebohe Molimo ka ho mo hloholofatsa ka bophelo bo botelele, kaha e ne e le mohale ea ratoang le ho hlomphe ke ba bangata. O re mohale enoa o bontšitse lerato, boitelo le botšephehi mosebetsing oa hae, 'me o hlokahala e le e mong oa batho ba sietseng naha ena lefa.

Lebitsong la Molaoli oa Sesole sa Lesotho (LDF), Lieutenant Colonel Kho-botle Khoabane o itse ho bohlokoa hore bophelo ba



mofu bo ketekoe, kaha o kentse letsoho eseng feela botsitsong le khotsong ea lefatše, empa le polokehong ea Basotho le thepa ea bona. A re ho ba le mohale enoa ho ba ratile hore hona le batho bao esaleng ba eme le naha ena, le ho bona hore seo ba neng ba itlamme ka sona se ea phethahala.

Motlatsi oa Mookame-li oa Litsi tsa Tlhabollo ea Batšoarua (LCS), Phoka Sekauti, o rorisitse Lance Sergeant Sematlane ka ho sebetsa ka boitelo ma-

fapheng a fapaneng kahare ho LCS le ho thusa ho nchafatsa bophelo ba batšoarua. O boetse a re mofu o lokela ho hlomphe le ho ketekoa ka lebaka la tlatsetso ea hae khotsong ea lefatše ka ho nka karolo Ntoeng ea Bobeli ea Lefatše.

Lefu Tšehlana, a emetse African Pioneer Corps, o ile a leboha bohle ba ntseng ba hlokomela maqheku a ntoa ka lilemo tse ngata, haholo-holo Molaoli oa LDF ea netefatsang boiketlo ba bona ka litšebeletso

tsa bophelo bo botle, lijo le mapato a hlomphehang a sesole ho ba seng ba hlokahatse. O boetse a mo thoholetsa ka ho ba mohale ea ileng a sebeletsa naha ka boitelo. "Lance Sergeant Sematlane o phetse bophelo ba hae ka botlalo, 'me o tla lula e le mohale." Ho boletse eena.

Nalane ea mofu e supa hore e ne e le e mong oa masole a 20,363 a ileng a khutla a phela kamor'a Ntoa ea Bobeli ea Lefatše. Ho boetse ho tlalehoa hore hajoale ho phela maqheku

a mabeli feela a tsoang ntoeng eo, e leng; Sergeant Mokhejane Khaile ea lilemo li 105 le Private Tumeli Pule ea lilemo li 98. Mofu o hlokahala a le lilemo li 106 kamor'a ho kula nako e khutšoanyane

Ka lehlakoreng le leng, Lesotho le ikopanya le linaha tse ling tsa lefatše selemo le selemo ho keteka Armistice Day, e atisang ho tšoareloa Makoanyane Square, moo ho behoang meqhaka ho hlomphe masole a ileng a nka karolo Ntoeng ea Pele le ea Bobeli ea Lefatše.





# TSA KEREKE

## Baena ba Setefane b'a ithhopha

### Tšeliso Thakholi

**L**itho tsa Kopano ea Baena ba Setefane tsa Deanary ea Mazenod li tla tšoara reterete ea pele ea selemo le selemo 'Mishoneng oa St. Joseph, Koro-Koro, ka la 25 ho isa la 28 Phupjane monongoaha, moo Molula-Setulo oa Tikoloho ea Mazenod Abuti Botiki Koneshe a boletseng hore morero o moholo oa reterete ena har'a tse ling tse ngata, ke ho bopa bonngoe ba Kopano, ho rapela 'moho e le limmishone tsa Deanary ea Mazenod le ho amohela litho tse ncha tsa Kopano.

Koneshe o boletse Koranta hore retereteng ena lithuto li arotsoe ka mekhahlelo e mararo e leng; bana, bahlankana le bontate. O bontšitse hore bana ba tla hlalhelloa ka lithuto tse kang tsa borapeli ho Fr. Joseph Gerard OMI ea Lehlohonolo, Nkhono 'Magabriel Mokhosi, boitšoarano ba Baena ba Setefane kantle le kahare ho Kereke, le nalane ea bophelo ba Setefane ea Halalelang eo e leng morapelli le mosireletsi oa Kopano.

Athe bahlankana bona ba tla ithuta ka botebo ka Kereke e Katholike, boitšoarano bophelong ka kakaretso le likamano tse mofuthu le batho ba bang litabeng tsa khoebo. Haele bo-ntate

bona ba tla rupeloa haholo ka bophelo ba lenyalo le ka thoko ho lona, mekhoha ea hajoale e nepahetseng ea ho ba motsoali oa sebele le bohlokoa ba lelapa ho ipapisitsoe le Lelapa le Halalelang la Jesu, Maria le Josefa. A re bo-ntate kamor'a lithuto tsa bona ba tla boela ba hetla morao ho etsa boithlahlobo ba hore na Kopano e fela e ntse e tsamaea tseleng e nepahetseng kapa che, 'me haele ba ho se joalo ba tla fana ka likhohale tso moo ba bonang lintho li sa tsamae hantle.

O boletse hore reterete ena ke ea pele e bulang selemo, moo ho ileng ha khahla Rameea oa Kopano le Komiti e Kholo phuthong eo ba bileng le eona selemong sena, hore pele ho e-ba le lireterete tse bulang selemo tsa Deanary kapa Tikoloho e Kholo ea Maseru, Parish kapa 'mishone ka 'ngoe e ke e qale pele ka ho tšoara ea eona e le 'ngoe ho itokisetse ea Deanary, 'me liretereteng tsa mofuta o joalo ba meme Komiti ea Tikoloho ho bona hore lintho li tsamaea hantle le ho ela hloko tšebetso ea bona.

A supa hore se thabisang ka ho fetisisa le ho bontša khohlo kahare ho Kopano ke hore lithuto tsohle tsa mohla reterete, li tli'o fanoa ke tse ling tsa litho tsa Baena ka bo tsona, kaha kahare ho



bona ho e-na le bahlankana le bo-ntate ba nang le litsebo tse khetheleng tsa lithuto tsona. Ka hona 'mishone ka mong o lebelletsoe ho ntša litho tse peli ho fana ka lithuto tsona.

O itse Bakokoti ba selemo se fetileng ba batla ba le bangata haholo papisong le ba selemong sena, kaha likhakanyo li bontša hore ba amohetsoeng ngoahola ba ne ba le 35 ha monongoaha ba ka 'na ba e-ba 33. Che le hoja lithophiso li e-s'o phetheloe hantle.

O qeteletse ka ho supa hore liparish le limmishone tsona tse lebeletsoe ke; Maria Mofumahali oa Lefatše, St. Joseph, St. Louis, St. Peter Clever, Maria Mofumahali oa Masabiella le kerekana ea St. Sabastian. Mohoo oa selemo sena ke: "Batlang pele tsa 'muso oa Molimo tse ling le tla liekeletsoa." (Mathew 6:36)



### 2025-2026 SELEMO A

#### MOKETE OA BORARO BO HALALELANG



Exoda 34:4-6.8-9  
Pesalema Dan 3:52-56  
2Ba-Korinthe 12:3-7.12-13  
Joannes 3:16-18



### Khothatso

#### Boraro bo Halalelang

**L**eha mokete oa kajeno o bua ka 'nete e fetang kutloisiso ea rona, re tšoanetse ho tseba seo re se lumelang ka Morena Molimo le bophelo ba hae. Hakhutšoanyane re ka re Molimo o mong feela. Molimo enoa a leng mong ke Ntate, ke Mora, ke Moea o Halalelang. Boraro bona, Ntate, Mora le Moea o Halalelang bo etsa Molimo a le mong, e seng melimo e mararo. Re sitoa ho utloisisa, empa leha ho le joalo, litšoantšo tse ling li ka thusa kelello e fokolang ea rona. Pitsa ea Sesotho, eo re phehang ka eona e maoto a mararo, empa ke pitsa e le 'ngoe. Menoana e mehlano ea letsoho la rona e etsa letsoho le leng. Mahlo a rona le litsebe tsa rona li peli; leha ho le joalo ke pono e le 'ngoe le kutlo e le 'ngoe.

Leoto le leng le leng la pitsa lea hloka hloka, 'me le na le mosebetsi oa lona. Pitsa e ke ke ea ema hantle ka leoto le le leng kapa a mabeli feela; maoto a mararo a lekana, a utloana, a tšehetsana. Leha menoana ea letsoho e le mehlano, e'a lumellana, e'a thusana, e'a tlatsana 'me e'a ratana. Matsoho a rona a mabeli h'a loantšane, empa a thusana ha monate.

Ho joalo le ho Morena Molimo: Ntate o re bopile. Mora o ile a iketsa motho, a phela le rona, a re shoela, a re pholosa ka ho tla re lata le ho re bontša tselo ea leholimo. Moea o Halalelang oa re phelisa 'me oa re matlafatsa, re tle re tsamae kamehla re kopane le Kriste.

Ba lumelang ho tsamaisoa ke Moea o Halalelang ke bana ba Molimo, ke majalefa le Kriste. Ke oona mohloho o moholo oa bophelo ba Morena Molimo. Leha Molimo a re phahametse haholo, leha bapersona ba le bararo feela ho eena, Molimo oa re baballa rona libupuoa tsa hae tse fokolang; o re entse re tšoane le eena, re le litšoantso tsa hae 'me o rata hore re abeloe bophelo ba hae le lehlohonolo la hae.

Joale, letsatsi lena ke la thabo e kholo, re lokela ho khumamela Morena Molimo, ho mo tlolisa, ho mo binela le ho mo thabela ka matla o'hle a rona, le ho leka ho hloekisa setšoantšo sa hae se ka ho rona, ka ho etsisa makhabane a hae, haholo lerato la hae, kutloano le tšebeliso.

Lerato le teng ho Molimo hobane bapersona ba bararo b'a tsebana 'me b'a hlompšana. Le rona re tla tseba ho ratana hantle mohla re tsebanang 'me re hlompšana. Ka baka lena, letsatsi lena la Mokete oa Boraro bo Halalelang le khethetsoe ntho e bitsoang "Litselana tseo batho ba tsebanang ka tsona." Mehlang ea khale batho ba ne ba tsebana ka ho bonana ka mahlo, ho utloana ka litsebe, ho buisana ka molomo le ho tšoarana ka matsoho. Ba ne ba sitoa ho tseba batho ba hole, ba mafatše a mang, ba ne ba sitoa ho tseba tse etsahalang linaheng tse ling tse hole, ha e se ka ho ikisa teng, empa ba ne ba hloka matla a ho etsa joalo.

Empa batho, ka ho sebelisa bohale ba bona, ba ile ba fumana litselana tse ncha tsa ho tsebana. Mokhoa oa pele oo ba o entseng ke mongolo, ke hore ho tšoantša ka lithaku mantsoe le maikutlo a bona le ho a ngola fatše. Ka mongolo ba fihletse ho tseba tsa mafatše a mang, ho ngola mangolo, likoranta le libuka.

Kamorao, ba ile ba qapa litselana tse ncha tse phakising ho feta: fono-fono eo ka eona ba tsebang le ho bua le motho leha a le hole haholo, le se-ea-le-moea se fetisetsang litaba le melaetsa ho batho ba hole. Lilemong tse fetileng batho ba entse mehloho ruri ka ntho tse ngata tse nang lebitso la sesotho tse bitsoang baescopo, gramophone, tape-recorder le television. E bile tse ling li tseleng, lia tla. Ho thoe kamoso ha re buisana ka fono, ha re na ho utloana feela, empa re tla bonana.

Tsena tsohle li bitsoa "Litselana tsa ho tsebana." 'Me letsatsi la kajeno le khethetse litselana tsona, hore re utloise bohlokoa ba tsona 'me re li sebelise ka nepo. Kereke, 'M'a rona e thabela litaba tsona tsa sejoale-joale hobane li thusa batho ho tsebana, ho ratana le ho utloana.

Taba ea pele eo re e rutoang ke hore re tšoanetse ho sebelisa litselana tsona tsa ho tsebana, hobane li re thusa ho rata batho le ho rata Morena Molimo. Ke 'nete ha se bohle ba nang le matla a ho sebelisa litselana tsona tsohle, hobane tse ling li sa ja chelete e ngata haholo, empa bohle re na le matla a ho sebelisa tse ling tsa rona. Re tšoanetse ho ngollana le bana babo rona le metsoalle ea rona ho matlafatsa lerato la rona. Re tšoanetse ho bala libuka le likoranta, e mong le e mong ka ho ea ka matla a hae, ho feba kelello ea rona le moea oa rona. Motho ea tsebang ho bala le ho ngola, empa ea sa sebeliseng tsebo e hae, o tšoana le motho ea tsetelang chelete ea hae mabung, ea sa e sebeliseng hore e hlalise phaello, 'me ka letsatsi la kahlo re tla botsoa ke moahloli oa rona holim'a mokhoa oo re ileng ra sebelisa litalentla tsa rona ka oona.

Taba ea bobeli, ke hore re li sebelise hantle. Ntho efe le efe e ka fetoha ntho e ntle kapa e mpe ka ho ea ka moo re e sebelisang kateng. Joale, re tšoanetse ho ngola ntho tse ntle feela, ho bala libuka le likoranta tse ntle feela, le ho sebelisa litselana tse ling ka mokhoa o ka re tsoelang molemo. Re se ke ra sheba litšoantso tse mpe, kapa ra letsa lipina tse fosahetseng, kapa ra senya nako ka ho mamela se-ea-le-moea re sa sebetse.

Taba ea boraro, ke hore e mong le e mong o tšoanetse ho etsa ka matla o'hle a hae ho thusa batho ba nang le boikarabello ba ho re lokisetse litsela tsona tsa ho tsebana tse ka re tsoelang molemo.

### Bahalaleli har'a Beke

- |   |          |                   |
|---|----------|-------------------|
| 1 | Phupjane | Inigo             |
| 2 | Phupjane | Ada               |
| 3 | Phupjane | Morand            |
| 4 | Phupjane | Elsiar            |
| 5 | Phupjane | Boniface oa Mainz |
| 6 | Phupjane | Abdas             |

# 'Mino o'a phelisa-GLB

**Tšeliso Thakholi**

**S**ehlopha se secha sa 'mino oa Jazz sa The Guest Live Band (GLB) se tloaetseng ho nyakalatsa barati le batšehetsi ba 'mino oa Jazz libakeng tse fapakaneng tsa mekete ea boithabiso, se re 'mino ha se feela boithabiso kapa hona ho tsanyaola, empa o'a phelisa.

Ho ea ka e mong oa libini tsa sehlopha sena ea haulang batho h'a hloelle-tse sethaleng a tantša ka makhethe, Sheleng Kibiti, ha ba tla theha sehlopha sa 'mino oa Jazz, morero ene e le hore ba ke ba fetole lintho kapa ho hlaha ka ntho e ncha, eo e leng ea bona kahare ho selika-likoe sa 'mino. "Hobane linakong tsa ho feta ho ne ho thoe Lesotho mona ha hona moo 'mino o ka isang motho teng, empa rona kannete rea bona hore bophelo bo teng 'minong." A rialo.

A re morero o moholo oa bona ke ho tsepamisa maitutlo haholo ka 'mino oa Jazz ea Sesotho, e le hore Sesotho se tsejoe le ho ratoa ka lefatše lohle. A re ba batla ho tsebahatsa manoni le monate oa puo ena ea habo bona ka 'mino oa

Jazz. "Le batho ba sa tse-beng puo ena ea Sesotho, o tla fumana hore ha ba e bina b'a e fosa. Joale kannete re ikemiselitse ho bona hore e etsa mosebetsi o tsoileng matsoho, ka ho sebelisa puo e nepahetseng ea Sesotho." O boletse joalo.

A re kante ho 'mino oa Jazz ea Sesotho le Sekhooa, ba bina Famo le 'mino oa Bolumeli. A re ba itšettlehile haholo ka ho bina lipina tsa Sesotho tse ratoang ke Basotho, e le hore 'mino oa bona o tle o se ke oa fela, "hobane 'mino oo re hlahileng o binoa ke liqhoku

tsa khale tsa 'mino, bohlo ba bona ha ba sa phela. Joale morero oa rona ke ho tsoosola 'mino oa khale oa Jazz."

A re 'mino ona oa bona oa khale o se o bapaloa likoiloing mona feela, 'me batho ba bangata ba nyoretsoe ho utloa lipina tsena tsa bona tse monate, hobane li fetoha pheko ho bona kaha motho ka mong li mo hopotsa maemo a monate kapa a bohloko ao a kileng a ba ho ona,

A tiisa hore 'mino oa Jazz le ha o ratoa haholo ke batho ba baholo, lipalo tsa ba-

cha ba o ratang li nyoloha ka tsela e potlakileng, 'me sena o se netefalitse ka hore meketeng e fakaneng eo ba seng ba bile ho eona, ba bone bacha ba tile ka bongata bo hlolang. Ka hona sena ke se seng sa pontšo ea hore bacha ba se ba rata 'mino oa Jazz haholo. "Mino oa Jazz o phutha bacha linthong tse ngata le ho ba etsa ngatana 'ngoe."

A re ba batla hore ba tlang kamor'a bona ba tsebe hore talenta ea 'mino e e'a phelisa ha se feela boithapollo le ho itlosa bolutu. "Ha re sa le lilemong tsane tseo re neng

re botsoa hore na ntho ena e tla re phelisa, kannete e'a phelisa." A re ka lebaka la liqholotso tsa ho hloka botšehetsi, ha ba e-s'o hatisi li-CD, empa morero ke hore hang ha ba fumana botšehetsi, ba hatise. A ipiletsa ho batho bohle ba boithatelo bo botle ho etsa letsoho la monna.

A qetelella ka hore tse ling tsa liqholotso tseo ba kopanang le tsona ke ho senyeheloa ka thepa, 'me takatso ea bona ke ho fumana botšehetsi e le hore taba ea 'mino oa bona e tsebe ho hola.



## Likuena e boikoetlisong

**Tšeliso Thakholi**

**S**ehlopha sa Naha sa Bolo ea Mao-to sa Likuena se boikoetlisong bo matla ho itokisetsa lipapali tsa pele tse peli tsa ho phunyaletsa ho ea Mohopeng oa AFCON isao, o il'o tšoareloa Kenya, Tanzania le Uganda ka la 19 Motšeanong ho isa la 17 Phupu 2027, moo Meyna ea Naha ea Niger e tlang ho bapala le eona ka Loetse, ha ka Pulungoana monongoaha e tla amohela Atlas Lions ea Morocco.

Leha lotho e ne e-s'o etsoe Likuena e ne e se e ile ea folofela leraba ka ho bit-sa libapali tse 45 ho hlaha lihlopheng tse fapakaneng tsa Liki e Kholo ea Vodacom ho qalella ho itokisetsa lipapali tsa AFCON. Lipapali tsa AFCON li arotsoe ka mekhahlelo e 12 e leng A ho isa ho L, 'me mokhahlelo ka mong o bopiloa ka

linaha tse 'ne. Naha ea Lesotho e Mokhahlelong oa A moo e pannoeng le lihlopha tse matla tse kang Morocco, Gabon le Niger.

Sehlopha se tla nka libeke li se kae ho fokoletsa lenane ho 28 e leng la mapomelo le tla emala naha ka Loetse le Pulungoana, 'me libapali tsohle tse bitsitsoeng li tla fumantšoa monyetla o moholo oa ho itšupa pele li ka kena sehlopheng sa mapomelo. Sehlopha sena se tli'l'o boptjoa boholo ka libapali tse ncha, kaha se na se tla thusa hore ho be le sehlopha se tla bapala nako e telele.

Leha lihlopha tse pannoeng le Likuena e le tsa tse ling tse matla Tikolohong ea Afrika, e tla be e sa qale ho bapala le tsona kaofela, kaha e se ile ea bapala le Niger makhetlo a mabeli litlholisanong tse fapakaneng, ea bapala le Gabon hararo ha Morocco e tla be e le lekhetlo la bobeli.

Hona ho bolela hore lihlopha tsena ha li ncha ho hang ho Likuena, e se e ntse e li tseba le hore na ho

lebelletsoe eng ho tsona. Ho mpang ho fetohile ke hore sehlopha sa Atlas Lions ea Morocco e tli'l'o qala ka mokoetlisi e mocha ha oa pele ea neng a le matla haholo a se a lokollotsoe. Sena se bolela hore linaha tsena tsa Mokhahlelo oa A li batla li le boemong bo lekanang, 'me Likuena e na le monyetla o moholo oa

hore e kaba boemong ba pele kapa ba bobeli.

Sehlopha hore se atlehe, se lokela ho matlafatsa boithuto ba sona ka lihlopha tsa Niger le Gabon pele se bapala le tsona. E 'ngoe e kholo ka ho fetisisa ke hore Basotho bohle ba tšehetse sehlopha sa bona sa Likuena ka lipuo tsa bona tse monate le ka liketso, e le ho

se thusa hore ka 2027 se etse nalane lekhetlo la pele, ea ho ba kahar'a linaha tse tlang ho ea lipapaling tsa AFCON 2027.

Ke ka kutloano le ka tšebeliso 'moho re le sechaba sa Basotho kaofela re ka tsebang ho thusa sehlopha sa naha ea habo rona, hore se atlehe ho ea ho AFCON. Ka sehlopha sena se ekelitsoeng ka libapali tse ncha, tšepo e kholo ke hore Lesotho le tla sebetsa hantle lipapaling tsena tsa AFCON.



# Kick4Life e ikhapela mohope

## Tšeliso Thakholi

**L**e ha sehlopha sa Bolo ea Maoto sa Basali sa Kick4Life se hlotsoe ho sireletsa mohope oa Liki e Kholo ea Basali, se e ntse nalane ka ho ikhapela Mohope oa Top 4 kamor'a ho shapa Berea Ladies ka 3-1 thahong ea mekoko, ha ka lebaleng li tsoile li bapetse ka seahlolo sa 1-1. Litlholisano tse na li ne li tšoaretsoe lebaleng la S. Russel, Mohale's Hoek ka la 24 Motšeanong monongoaha.

Papali e ile ea qala ka sekahla le hoja lihlopha ka bobeli li ne li qoba ho etsa liphoso, e le ho thibela ho hlajoa ntlha pele, 'me hoo ha ama sekahla seo papali e neng e qalile ka sona. Ha papali e ntse e futhumala Kick-



bitsang ka teng a lekanya lintlha e ba 1-1.

ba boraro le ba bone ka tatellano, LDF Ladies eo e leng bompoli ba Liki e Kholo ea Basali, e ile ea shashara Lijabatho Ladies ka phafa ea 5-0.

to Shoaepane oa Berea Ladies a ikhapela khau ea ho ba sebakali se hlabileng lintlha tse ngata ha Molemo Mokhothu oa Kick4Life a ile a hapa

tsa Top 4.

Mokoetlisi oa Kick4Life Shalane Lehohla o supile h'a thabisitsoe haholo ke tlhoho ea sehlopha sa hae, a bile a re ke hona ba tli'o sebetsa ka matla a maholo ha liki e qala, ho hlola lihlopha tse ngata. A leboha sehlopha sa hae ka phetoho eo a e boneng papaling ea sona litlholisanong tse na, e ntle haholo. Haele mokoetlisi oa Berea Ladies Lehloenyha Nkhasi le eena ka mokhoa o tšoanang, o boletse hore o khotsofetse haholo ke tsela eo sehlopha sa hae se bapetseng ka eona, empa o ntse a hloka ho ea lokisa mona le mane moo sehlopha sa hae se fokolang teng.



4Life Women e bonahtse e leka ka hohle ho hlola papali, kaha e ne e leka ho hlasela hohlaha bohareng ba lebala le ka mahlakoreng.

Lintho li ile tsa fetoha metsotsong e 22 ea karolo ea pele ea papali, ha Kick4Life e hlabisa ntlha ea pele ka leoto la Molemo Mokhothu ho hlaha bohareng ba lebala. Ntlha ena e ile ea siea batšehetsi ba Berea Ladies ba le tsitsipanong e kholo, kaha ba ne ba lumela hore ba se ba hlotsoe ho hlabisa lintlha ho latela maemo a holimo a papali ea letsatsi leo. Leha ho le joalo, metsotsong e 27 ke ha Lerato Shoaepane 'Sannere' ka moo ba mo

Papali e ile khufutsong e le 1-1, ha li khutla ho ile ha tloa litlhase e le ha sehlopha ka seng se batla tlhoho, e bile ho se ho bonahala Berea Ladies e imela Kick4Life Women e neng e se e imetsoe ke mokhathala, empa sethibathibane sa eona Boelo Lepheane ea bileng a khethoa e le eena sethibathibane se hloahloa, o ile a ipabola ka ho thiba libolo tse kotsi haholo ho fihlela papali e fela li ntse li lekana. Lihlopha li ile tsa ea thahong ea mekoko, moo Kick4Life e ileng ea ikhapela papali eo ka 3-1.

Haele papaling ea pele ea letsatsi leo ke moo ho neng ho tsekoa boemo



Ha ho le joalo, boemong ba pele e bile Kick4Life Women, ea ikhapela mohope le limentlele tsa Khauta, bobeling ea e-ba Berea Ladies, ea hapa limentlele tsa Silifera, borarong ea eba LDF Ladies ka ho iphumanela limentlele tsa Bronze ha boneng e bile Lijabatho Ladies.

Ho boetse ha e-ba le phano ea likhau ho libakali tse ipabotseng, moo Boelo Lepheane oa Kick4Life a ileng a ikhapela khau ea ho ba sethibathibane se hloahloa, Lera-

khau ea ho ba sebakali sehloahloa sa litlholisano

